

Ɖɔɔlo ɔwɔɛ ɔbono ɔ ɨmarasɛ Bunge
Galati Awura Mɔ

Yesu ɔsɔɔ

¹ Me Ɖɔɔlo ɔbono n gyɛ Yesu ɔsɔɔ mɔ ne n kya ɨmarasɛ fɛye gɛnen ɔwɔɛ baarɛ faa. In gyɛ anyamesɛ ne n lɛɛ me abɛɛ anyamesɛ ne n sun me yɛɛ n' wɔra Yesu ɔsɔɔ. I gyɛ daa Yesu Kirisito de mɔ-sɛ Wurubuaarɛ ɔbono o kyingi mɔ lii ibuni dɔ mɔ ne n sun me. ² Me-rɛ me-nanboana abono a kya son Yesu gɛrɛ mɔ pɛwu ne n dɛ ɔwɔɛ baarɛ a kya bunge fɛye Yesu asonbo akpen abono fɛ bo Galati gɛsinkpan so mɔ. ³ Aye-sɛ Wurubuaarɛ de aye-Wura Yesu Kirisito mɛ' sa fɛye so gɛwɔnsa dɛnsɛ de mɛ' sa fɛye gisen yuuli. ⁴ Yesu ne n kyu mɔ-nyoro kyɛɛ ne o wu' sa aye de a' nyɛ aye-nyoro lii ndɛ' asa adɛ ilaa nyɛnyɛn giwɔra dɔ. Aye-sɛ Wurubuaarɛ gɛlaarɛ dɔ ne Yesu gi wɔra gɛnen ilaa idɛ. ⁵ Nyisigyi ɔ' wɔra Wurubuaarɛ-lɛɛ gɛkpaa-gɛkpaa! I' ba gɛnen.

Kirisito ɔkalan

⁶ I kya dɛ me-gɛnɔ yɛɛ fɛ ti kpɛ fa-a taa Wurubuaarɛ fa-a yɛgɛ kusaa gɛnen. Mɔ ne n tɔgɛ fɛye yɛɛ fɛ' baa nyɛ mɔ-amɔlɛgɛ abono ɔ kyɛɛ fɛye kyu naa de Kirisito so mɔ. Fɛye mɔ fɛ kii fɛ kya nu daa de ɔkalan ɔko kpɛi. ⁷ Nɛ tɔgɛ gɛnen faa, gɛsintin ne n gyɛ yɛɛ in bo ɔkalan konkɔnsɛ banban ɔko. Asa ako mɔ mɛ kya kpadɛɛ fɛye-nwɔnsa dɔ mɛ kya laarɛ de mɛ' kyɛɛgɛ Kirisito ɔkalan konkɔnsɛ mɔ. ⁸ Imɔso ba-a nengyene aye abɛɛ Wurubuaarɛ dɔ ɔsɔɔ ne n kpelegɛ lii Wurubuaarɛ dɔ ba baa tɔgɛ fɛye ɔkalan ɔbono ɔɨ kyena de ɔbono a wolaa

buu sa fɛye mɔ, kaase mɔ mɔ-rɛ Wurubuaare abaa anyɔ. ⁹Fɛɛ gɛnɔɔbono a wolaa tɔgɛ fɛye mɔ, idɛ kon n kii mi-i tɔgɛ mi-i sa fɛye yɛɛ ɔkamaase ɔbono ɔ kya tɔgɛ fɛye ɔkalan kyu lii Yesu so ne ɔɲ kyena de ɔkalan ɔbono fɛ wolaa nu lii aye ase mɔ, kaase mɔ mɔ-rɛ Wurubuaare abaa anyɔ. ¹⁰NE tɔgɛ imɔ idɛ gɛnen faa, anyamesɛ ginsi ne n' kya laare n' gyi abɛɛ Wurubuaare ginsi ne n' kya laare n' gyi daa? Fɛ kya kerɛ faa, n kya tɔgɛ daa ilaa ibono i laa wɔra anyamesɛ ɔbolɛ mɔ abɛɛ? Naafɔ n kya kerɛ daa ilaa ibono i laa wɔra anyamesɛ ɔbolɛ pɛi de n' lɔɔ wɔra me-ilaa mɔ, nkana Yesu Kirisito mɛɲ gyɛ me-wura ne.

Gɛnɔɔbono Pɔɔlo Gi Baa Wɔra Yesu ɔsɔɔ Mɔ

¹¹Me-nanboana Yesu asonbo, n kya laare de fɛ' bii yɛɛ Yesu ɔkalan konkɔnsɛ ɔbono nɛ lɛɛ tɔgɛ sa fɛye mɔ mɛɲ gyɛ nyamesɛ-lɛɛ ɔkalan. ¹²I mɛɲ gyɛ nyamesɛ ase ne nɛ nu ɔkalan mɔ lii. Iɲ gyɛ nyamesɛ ne n nyiile me. Yesu Kirisito ne n lɛɛ ɔkalan baare gɛwi nyiile me. ¹³Fɛ nu ilaa ibono nkana n kya wɔra owi ɔbono n kya son Wurubuaare kyu naa de me-naanaana Gyuda awura itiibilaa so mɔ. N' buu sa fɛye yɛɛ nɛ ka asa abono mɛ kya son Wurubuaare kyu naa de mɔ-bi Yesu so mɔ ansi gikyɔ. NE laare fɛɛ nkana n' nyida gɛnen asa mɔ mɔmɔ-rɛ mɔmɔ-ɔson mɔ. ¹⁴Nkana n kya wɔra aye Gyuda awura ilaa wɔrase imɔ-ɔkpa so don me-gikoso dɔ Gyuda awura sakyɔ. Aye-naanaana itiibi ilaa mɔ i gyi me-gimu gɛnen owi ɔbono dɔ. ¹⁵Dabɔlɛ ibono nɛ ka Wurubuaare mɔ-rɛ mɔ-bi mɔ asonbo adɛ ansi faa, pɛi de i' lɔɔ korogɛ me mɔ, Wurubuaare gi wolaa lɛɛ me yela. ɔ sa me so gɛwɔnsa dɛnsɛ ne ɔ tɔgɛ me yɛɛ n' son mɔ-rɛ mɔ-bi mɔ. ¹⁶I wɔra Wurubuaare ɔbolɛ yɛɛ ɔ' lɛɛ mɔ-bi Yesu nyiile me de n' naa n kya tɔgɛ ɔkalan konkɔnsɛ kyu lii mɔ-bi mɔ so sa abono mɛ mɛɲ gyɛ Gyuda awura mɔ. Wurubuaare

gi kpe lɛɛ mɔ-bi mɔ nyiile me mɔ, meŋ kpe isa aɛ yɛɛ o' nyiile me Yesu ilaa. ¹⁷ Meŋ kpe Gyɛrusalem kpaa wu abono mɛ gyangbara me wɔra Yesu isɔɔ mɔ. Nɛ kpe koso naa daa kyon kpe Arabiya gɛsinkpan so, ne nɛ kii baa kyon kpe Damasikose ɔsowole so. ¹⁸ Nsi nsa gɛmara pɛi ne nɛ baa kpe Gyɛrusalem kpaa faala Piita ne a nyɛ bii abara. Nɛ kpe gɛnen mɔ, nkɛ gudu nnun ne nɛ kyena mɔ aɛ nno. ¹⁹ Meŋ wu Yesu isɔɔ aɛnɛ mɔ baa bɔla, gɛnen mɔ, Gyeemesi aye-Wura Yesu mɔ-tede mɔ wole. ²⁰ Ilaa ibono n kya ŋmarasɛ mi-i sa fɛye faa, Wurubuaarɛ nyi yɛɛ meŋ kya kɛɛ abon. I gyɛ daa gɛsintin. ²¹ Imɔ gɛmara mɔ, nɛ kyon kpe Siiriya de Silisiya nsinkpan so.

²² Gɛnen owi ɔbono pɛwu mɔ, Yesu asonbo akpen abono a bo Gyudiya gɛsinkpan so mɔ mɛ mɛŋ nyi me de ansi. ²³ Mɛ kya nu me-ilaa de aso daa yɛɛ, “ɔnyen ɔbono nkana ɔ kya ka aye Yesu asonbo mɔ ansi mɔ, idɛ kon kerɛ, mɔ mɔ ne n kii ɔ kya tɔgɛ Yesu ɔkalan konkonsɛ ɔbono ɔ laarɛ mɔ-inyidaten mɔ ɔ sa asa mɔ.” ²⁴ Me-ilaa idɛ i yɛgɛ mɛ yen Wurubuaarɛ.

2

Pɔɔlo Gi Kpe Yesu Asonbo Abelɛnsɛ Aɛ Gyɛrusalem

¹ Nsi gudu nnan gɛmara mɔ, nɛ kii kpe Yesu asonbo mɔ aɛ Gyɛrusalem. Me-rɛ Banabasɛ ne n kpe. A kya kpe mɔ, nɛ kyu Taatusi buu me-nyoro. ² Wurubuaarɛ ne n lɛɛ nyiile me yɛɛ n' kii kpe nno. Nɛ kpe mɔ, nɛ kpaa nyiile mɔmɔ Yesu ɔkalan konkonsɛ ɔbono n dɛ mi-i tɔgɛ mi-i sa asa abono mɛ mɛŋ gyɛ Gyuda awura mɔ. Abono yɛɛ mɔmɔ ne n gyɛ abelɛnsɛ mɔ, nɛ yɛgɛ me-rɛ ɔmɔ a gyan aye-wole. Nɛ laarɛ yɛɛ gɛnen abelɛnsɛ mɔ mɛ' nu me-gɛsun mɔ gɛsɛ de iŋ sa i' ba yɛɛ Yesu ɔkalan mɔ gɛsun gɛbono n kya wɔra faa de mɔ-gɛsun gɛbono nan kii wɔra mɔ gɛ' wɔra giyan. ³ Nɛ kpe abelɛnsɛ adɛ aɛ

gɛnen mɔ, ba-a me-nanbo Taatusi ɔbono me-rɛ mɔ a naa ne ɔ mɛɲ gyɛ Gyuda isa mɔ, abelɛnsɛ mɔ ɔko-rɛ ɔko mɛɲ nyise mɔ yɛɛ ɔ' ten mɔ-giwɔrɛ aye Gyuda awura itiibilaa ɔkpa so.

⁴ Pɛi de n' kpe Gyɛrusalem mɔ, asa abono mɛ kya penɛ yɛɛ mɛ kya son Yesu mɔ ako mɛ baa loo aye Yesu asonbo mɔ dɔ de mɛ' nyɛ baa kerɛ aye-akyeɛnabi de gɛnɔɔbono a nyɛ aye-nyoro kyu lii Kirisito Yesu so mɔ. Mɛ baa loo aye dɔ gɛnen mɔ, mɛ kya laarɛ daa fɛɛ a' gyi aye Gyuda awura itiibilaa de nbara mɔ pɛwu ɔkpa so kee aye Yesu ɔson mɔ dɔ de a' kii wɔra fɛɛ nbide sa nbara mɔ. ⁵ Kyu lii fɛye so mɔ, a mɛɲ kyule gɛnen asa abono. A kine mɔmɔ-lɛɛ de fɛ' nyɛ nu gɛsintin-lɛɛ ɔkalan konkonsɛ kyu lii Yesu so.

⁶ Nɛ kpe abono yɛɛ mɔmɔ ne n gyɛ abelɛnsɛ Yesu asonbo mɔ dɔ mɔ asɛ mɔ, mɛɲ nyɛ ilaa nyiileɛ pobɔɔ iko lii ɔmɔ asɛ. (Nɛ taa terɛ mɔmɔ yɛɛ abelɛnsɛ faa, asa abono ɔnan mɛ gyɛ mɔ lɛɛ iɲ tiri me. I lii fɛɛ Wurubuaarɛ mɛɲ kya kerɛ asa ansi so.) To. Fɛɛ gɛnɔɔbono nɛ tɔgɛ faa, gɛnen abelɛnsɛ mɔ mɛ mɛɲ kyu sɛi kyu bɔla me-lɛɛ anyiilebi mɔ so. ⁷ Mɛ wu me bii yɛɛ Wurubuaarɛ ne n kyu Yesu ɔkalan konkonsɛ mɔ kyu wɔra me-abaa dɔ de n' lɛɛ mɔ nyiile asa abono mɛ mɛɲ gyɛ Gyuda awura mɔ fɛɛ gɛnɔɔbono o kyu gɛnen ɔkalan baarɛ kee wɔra Piita abaa dɔ de ɔ' lɛɛ mɔ nyiile Gyuda awura mɔ. ⁸ (I kya nyiile yɛɛ Wurubuaarɛ ɔbono ɔ wɔra gɛsun kyu naa de Piita so ne ɔ nyɛ wɔra Yesu ɔsɔɔ sa Gyuda awura mɔ, gɛnen Wurubuaarɛ kolon ɔbono kee ne n wɔra gɛsun kyu naa de me so ne nɛ wɔra Yesu ɔsɔɔ sa asa abono mɛ mɛɲ gyɛ Gyuda awura mɔ.)

⁹ Abelɛnsɛ mɔ mɛ nyɛ wu bii yɛɛ Wurubuaarɛ ne n kpaa me ne nɛ wɔra Yesu ɔsɔɔ sa asa abono mɛ mɛɲ gyɛ Gyuda awura mɔ gɛnen. Imɔso Gyeemesi, Piita, de

Gyɔn, abono yɛɛ mɔmɔ ne n gyɛ nkpara sa Yesu ɔson mɔ, mɛ kɔɔlɛ kyule yɛɛ me-rɛ Banabasɛ de mɔmɔ pɛwu a gyɛ daa nyamesɛ kolon gɛsun mɔ dɔ. Imɔso aye mɔ, a' kpe abono mɛ mɛɛn gyɛ Gyuda awura mɔ asɛ de mɔmɔ mɔ mɛ' kpe Gyuda awura mɔ asɛ. ¹⁰ Mɛ tɔgɛ aye yɛɛ a' wolaa nyingi de a' kpaa ayenbo. Gɛnen ilaa ibono kee ne nɛ wolaa kyu too me-nyoro so n kya wɔra.

Pɔɔlo Gi Tɔgɛ Piita Yɛɛ Ilaa Ibono ɔ Wɔra Mɔ In Kyena

¹¹ Owi ɔbono Piita gi ba Antiyoki mɔ, ilaa ibono ɔ wɔra nno mɔ berɛ, in kyena. Imɔso nɛ tɔgɛ tigi mɔ. ¹² I kya nyiile yɛɛ nkana mɔ-rɛ Yesu asonbo abono mɛ mɛɛn gyɛ Gyuda awura mɔ mɛ kya kyena wɔra abaa gyi dabɔlɛ kanpɛ. ɔ bo nno mɔ, mɔ-nanboana Gyuda awura abono mɛ gyɛ Gyeemesi adɛ mɔ ako mɛ kpe mɔ asɛ. Mɛ kpe mɔ asɛ gɛnen mɔ, ɔ tɛɛ mɔ-nyoro lii abono mɛ mɛɛn gyɛ Gyuda awura mɔ dɔ. ɔn baa o kyule mada de ɔmɔ. I kya nyiile yɛɛ abono mɛ kpe mɔ asɛ mɔ mɛ kpe mɛ dɛ daa yɛɛ ɔbono ɔ mɛɛn gyɛ aye Gyuda isa mɔ laa ten giwɔrɛ de o' gyi Gyuda awura nbara so pɛi de ɔ' taalɛ son Yesu ɔkpa so. Piita seɛ asa adɛ gifuu so ne ɔ tɛɛ mɔ-nyoro gɛnen.

¹³ Gyuda awura sɛnsɛ abono mɛ kya son Yesu mɔ mɛ wu gɛnen mɔ, mɔmɔ kee mɛ yii gɛsɛ mɛ kya taa gɛsintin ɔkpa mɔ ma-a yɛgɛ, kaaborɛ i yɛgɛ Banabasɛ gbaa gi buu mɔmɔ-lɛɛ ɔkpa mɔ. ¹⁴ Mi-i me mɔ, nɛ wu ibono mɛɛn kya naa ntintin gɛnɔɔbono i kya kyena de Yesu gɛsintin ɔkalan konkonsɛ mɔ. Imɔso nɛ taasɛ Piita Yesu asonbo mɔ pɛwu ansi dɔ yɛɛ, “Fo-o fo mɔ, fo gyɛ daa Gyudanyen ne fo taa Gyuda awura akyenabi mɔ yɛgɛ ne fo san fo tɛ daa fɛɛ asa abono mɛ mɛɛn gyɛ Gyuda awura mɔ. Mɔ, nɛ so ne fo laa taalɛ nyise abono mɛ mɛɛn gyɛ Gyuda awura mɔ de mɛ' kyena Gyuda awura akyenabi? ¹⁵ Gɛkorogɛ

dɔ mɔ, me-rɛ fo Piita a gyɛ daa Gyuda awura. A mɛɲ gyɛ asa sɛnsɛ abono mɛ mɛɲ wolaa mɛ nyi Wurubuaarɛ agyɛbi ne mɛ kya fuɛ Wurubuaarɛ ɔkpa mɔ. ¹⁶ Aye gbaa-gbaa a nyɛ bii yɛɛ i mɛɲ gyɛ aye Gyuda awura itiibilaa mɔ abɛɛ nbara mɔ so gigyɛ ne nan yɛgɛ Wurubuaarɛ o' kyu nyamesɛ yɛɛ mɔ-gisen dɔ i boran. I gyɛ daa gikagyan gibono nyamesɛ laa ka gyan Yesu Kirisito so mɔ. Imɔso ne aye gbaa-gbaa kee a ka gyan Yesu Kirisito so de Wurubuaarɛ o' kyu aye yɛɛ aye-asen dɔ i boran kyu naa de aye gɛnen gikagyan gibono so. I mɛɲ gyɛ aye Gyuda awura itiibilaa mɔ gigyɛ so. I lii fɛɛ Wurubuaarɛ gi tɔgɛ yɛɛ ɔ maɲ kyu nyamesɛ yɛɛ mɔ-gisen dɔ i boran kyu lii itiibilaa abɛɛ nbara so gigyɛ.”

ɔkalan Konkonsɛ ɔbono Pɔɔlo Kya Nyiile Asa Mɔ

¹⁷ Gɛnɔɔbono aye-ansi a gyan yɛɛ Wurubuaarɛ laa kyu aye yɛɛ aye-asen dɔ i boran kyu naa de aye-rɛ Kirisito ginyamesɛ kolon mɔ so mɔ, i yɛgɛ aye gbaa-gbaa a bingiri abono mɛɲ kya gyi Gyuda awura itiibilaa mɔ so. Imɔso a taa itiibilaa yɛgɛ de Wurubuaarɛ o' kyu aye yɛɛ aye-asen dɔ i boran faa mɔ, a wɔra ilaa nyɛnyɛn ne? Kirisito kya yɛgɛ asa mɛ' wɔra ilaa nyɛnyɛn? Kuaa, iɲ gyɛ gɛnen! ¹⁸ Nengyene n nyi yɛɛ ilaa idɛ iɲ boran sa me ne nɛ kine imɔ, ne nɛ kii kpaa kyu imɔ mɔ, nɛ lɛɛ me-nyoro nyiile yɛɛ n gyɛ ilaa nyɛnyɛn ɔwɔrabo ne. ¹⁹ Imɔ gɛsɛ ne n gyɛ yɛɛ nkana n kya gyi Gyuda awura itiibilaa so, ne Wurubuaarɛ mɛɲ kyu me yɛɛ me-gisen dɔ i boran. Imɔso i wɔra fɛɛ nɛ wu' lii itiibilaa mɔ dɔ. Mɛɲ baa n tɛ sa itiibilaa mɔ de n' san nyɛ kyena sa daa Wurubuaarɛ. ²⁰ Nɛ taa tɔgɛ yɛɛ nɛ wɔra fɛɛ nɛ wu' faa mɔ, i wɔra daa fɛɛ me-rɛ Kirisito pɛwu ne mɛ da aɲanbi oyii so mɔɔ gikolon. Iɲ baa i gyɛ me ne n' tɛ. Yesu Kirisito ne n san ɔ tɛ me dɔ. Wurubuaarɛ mɔ-bi Yesu ɔbono ɔ laarɛ me-ilaa ne o wu' sa me mɔ so ne n' kya ka gyan de

n' nyɛ n tɛ gɛkyena gɛbono n tɛ faa. ²¹ Gidɛnsɛ gibono Wurubuaarɛ gi wɔra sa anyamesɛ mɔ, maŋ kyu gimɔ yɛɛ giŋ gyɛ sɛi. Ne fɛɛ i gyɛ gɛsintin yɛɛ Wurubuaarɛ kya kyu nyamesɛ yɛɛ mɔ-gisen dɔ i boran kyu naa daa de itiibilaa gigyi so mɔ, nkana lɛwu ɔbono Yesu Kirisito gi baa wu' sa anyamesɛ faa, nkana giyan ne.

3

Anɛ Ne N Penɛ Fɛye?

¹ Fɛye Galati awura, anɛ ne n penɛ fɛye daa? Fɛ mɛŋ nyi ɔlaako. Nɛ wolaa kaala nyiile fɛye gɛnɔɔbono Yesu Kirisito gi wu' lɛwu oyii so sa fɛye mɔ. Sɛi mɛŋ ŋara fɛye. ² Imɔso n' taasɛ fɛye ilaa kolon idɛ: Wurubuaarɛ Oduduu mɔ gi daa giba fɛye so mɔ, fɛ nyi yɛɛ ibono fɛ kya gyi nbara mɔ so mɔ daa? Iŋ gyɛ ibono fɛ nu Yesu ɔkalan konkonsɛ mɔ ne fɛ ka gyan mɔ so mɔ daa? ³ Fɛ mɛŋ nyi ɔlaako daa do-o? Ibono fɛ yii gɛsɛ kanpɛ de Wurubuaarɛ Oduduu mɔ, fɛ laa san kyu fɛye anyamesɛ-lɛɛ ɔlon daa kyu logɛ? ⁴ Ibono pɛwu fɛ wu ɔlaa sa Yesu ɔson mɔ faa mɔ, fɛ kya laarɛ fɛ' wɔra awɔrafuɛ? Imɔso i gyɛ gɛsintin yɛɛ fɛ laa wɔra awɔrafuɛ? ⁵ Gɛnɔɔbono Wurubuaarɛ kpɛ ɔ dɛ mɔ-Oduduu mɔ ɔ kya sa fɛye ne ɔ kya wɔra ilaa ibono i kya lɛɛ mɔ-ɔlon nyiile fɛye mɔ, fɛ nyi yɛɛ fɛye-nbara gigyi so ne ɔ kya wɔra imɔ gɛnen? Iŋ gyɛ Yesu ilaa ibono fɛ nu ne fɛ ka gyan mɔ so?

⁶ Fɛ' taa kerɛ aye Gyuda awura ɔnaana gyangbarasɛ ɔbono mɛ kya terɛ mɔ yɛɛ Aberaham mɔ ilaa. Wurubuaarɛ agyɛbi ako a tɔgɛ yɛɛ,

“Aberaham gi ka gyan Wurubuaarɛ so.

Ne mɔ-gikagyan gibono so mɔ,

Wurubuaarɛ gi kyu mɔ yɛɛ mɔ-gisen dɔ i boran.”

⁷ Imɔso i kaaborɛ fɛ' bii yɛɛ asa abono mɛ kya ka gyan Wurubuaarɛ so mɔ, mɔmɔ ne n gyɛ Aberaham mɔ-naanaana gɛsintin. ⁸ Wurubuaarɛ agyɛbi mɔ kee a kya tɔgɛ gikagyan gidɛ so ilaa. Wurubuaarɛ wolaa o nyi yɛɛ ɔ laa kyu abono mɛ mɛɲ gyɛ Gyuda awura mɔ kee yɛɛ mɔmɔ-asen dɔ i boran kyu naa de mɔmɔ-gikagyan gibono mɛ laa ka gyan mɔ Wurubuaarɛ so mɔ. I bo Wurubuaarɛ agyɛbi mɔ dɔ yɛɛ Wurubuaarɛ gi wolaa tɔgɛ mɔ-ɔkalan konkonsɛ mɔ yela sa Aberaham yɛɛ,
 “Kyu naa de fo so mɔ, nan yuule nsinkpan kpɛi-kpɛi pɛwu so asa.”

⁹ Imɔso lii nfono mɔ a laa bii yɛɛ Wurubuaarɛ kya yuule nyamesɛ kamaasɛ ɔbono ɔ kya ka gyan Wurubuaarɛ so mɔ kyu dabɔlɛ de Aberaham ɔbono ɔ wolaa ka gyan Wurubuaarɛ so mɔ.

ɔko-rɛ ɔko Maɲ Taalɛ Gyi Nbara Mɔ Pɛwu So

¹⁰ I bo Wurubuaarɛ agyɛbi dɔ yɛɛ,
 “ɔbono ɔɲ kya wɔra ilaa kamaasɛ
 ibono Wurubuaarɛ nbara mɔ gi kya nyiile
 fɛɛ gɛnɔɔbono mɛ ɲmarasɛ Wurubuaarɛ nbara ɔwolɛ
 dɔ mɔ,
 gɛnen kaasɛ mɔ mɔ-rɛ Wurubuaarɛ abaa anyɔ.”

ɔko-rɛ ɔko mɔ, maɲ taalɛ gyi nbara mɔ pɛwu so. Imɔso nyamesɛ kamaasɛ ɔbono ɔ kya ka gyan nbara gigyi so mɔ, mɔ-rɛ Wurubuaarɛ abaa anyɔ. ¹¹ I gyɛ gɛsintin yɛɛ nyamesɛ fo gyi nbara so pɛwu gbaa mɔ, iɲ gyɛ imɔ ne nan yɛgɛ Wurubuaarɛ o' kyu fo yɛɛ fo-gisen dɔ i boran. I lii fɛɛ Wurubuaarɛ gi wolaa tɔgɛ yɛɛ,

“ɔbono ɔ kya ka gyan Wurubuaarɛ so mɔ ne
 Wurubuaarɛ kya kyu yɛɛ mɔ-gisen dɔ i boran.
 Gɛnen kaasɛ ɔbono ne nan nyɛ Wurubuaarɛ asɛ
 gɛkyena.”

¹² Nbara bere, mɛɲ kya ka gyan nmɔ so. Mɛ kya gyi nmɔ so daa. Wurubuaarɛ gi wolaa tɔgɛ yela yɛɛ,

“ɔbono o gyi nbara mɔ so mɔ

ne nan nyɛ kyena Wurubuaarɛ asɛ kyu naa de nbara mɔ so.”

¹³ Nnɔ nbono Wurubuaarɛ gi tɔgɛ wɔra aye abono aɲ kya gyi mɔ-nbara mɔ so mɔ ɔ yɛgɛ Yesu gi fiyɛɛ nnɔ sa aye. Kyu lii aye-ilaa nyɛnyɛn so mɔ, Yesu ne Wurubuaarɛ gi san tɔgɛ nnɔ wɔra. I lii fɛɛ Wurubuaarɛ agyɛbi dɔ i kya tɔgɛ yɛɛ,

“Nyamesɛ kamaasɛ ɔbono mɛ kyɔɔlɔga mɔ oyii so mɔɔ kyu biidɛ mɔ-giso mɔ,

Wurubuaarɛ gi tɔgɛ nnɔ wɔra kaasɛ mɔ ne.”

¹⁴ Wurubuaarɛ kya laarɛ o' yuule gɛsinkpan so asa kpɛi-kpɛi fɛɛ gɛnɔɔbono ɔ wolaa yuule Aberaham mɔ. Imɔso ne Yesu gi yelɛ aye anyamesɛ giyaa dɔ ka aye-ilaa nyɛnyɛn gikɔ de Wurubuaarɛ ɔ' nyɛ yuule aye kii kyu naa de aye-rɛ Kirisito Yesu ginyamesɛ kolon mɔ so. Imɔ ne n gyɛ yɛɛ aye abono a kya ka gyan Yesu so mɔ, a kya nyɛ Wurubuaarɛ Oduduu ɔbono ɔ wolaa ka yela yɛɛ ɔ laa sa anyamesɛ mɔ.

Ilaa Ibono Wurubuaarɛ Gi Ka Yela Sa Anyamesɛ Mɔ

¹⁵ Me-nanboana Yesu asonbo, n' taa kyu anyamesɛ gɛkyena dɔ ilaa kyu wɔra sinkaala sa fɛye. Nengyene nyamesɛ gi nyɛ ka ntan mɔ, mɛ mɛɲ lɛɛ nmɔ mɔ, nyamesɛ maɲ taalɛ kine nmɔ abɛɛ ɔ' kyɛɛgɛ nmɔ.

¹⁶ Wurubuaarɛ gi wolaa ka ilaa dɛnsɛ yela sa anyamesɛ pɛwu. ɔ ka imɔ yela sa ɔmɔ kyu naa de Aberaham de mɔ-ɔnaanabi mɔ so. Wurubuaarɛ agyɛbi mɔ dɔ nfono n darɛ faa mɔ, i mɛɲ tɔgɛ yɛɛ, “de Aberaham anaanabi.” I nen tɔgɛ yɛɛ “anaanabi” mɔ, mɛ kyɔ ne. I tɔgɛ daa yɛɛ, “de Aberaham ɔnaanabi.” Nyamesɛ kolon ne ɔ gyɛ

ne. GENEN ɔnaanabi ɔbono ne n gyɛ Kirisito. ¹⁷ To! Ibono n dare mɔ ne n gyɛ yɛɛ fɛɛ gɛnɔɔbono asa mɛ maŋ taalɛ kine abɛɛ mɛ' kyɛɛgɛ nyamesɛ-lɛɛ ntan mɔ, gɛnen kee ne Wurubuaarɛ agyɛbi a dɛ ne. Wurubuaarɛ gi wolaa ka yela yɛɛ kyu naa de Aberaham so ne ɔ laa kyule de o' yuule anyamesɛ de mɛ' nyɛ wɔra mɔ-asonbo gɛsintin. I wɔra nsi nwe nnan de nsi oko de saalaa gɛmara mɔ, pɛi ne Wurubuaarɛ gi lɔɔ lɛɛ mɔ-nbara nyiile Aberaham mɔ-naanaana Gyuda awura mɔ. GENEN Wurubuaarɛ nbara mɔ gi mɛŋ taalɛ kyadɛ ilaa ibono Wurubuaarɛ gi wolaa ka yela mɔ ɔwolɛ fuɛ. ¹⁸ Nengyene fɛɛ i tiri yɛɛ anyamesɛ mɛ' gyi Wurubuaarɛ nbara so pɛi de mɛ' lɔɔ nyɛ Wurubuaarɛ ayuule de mɛ' wɔra mɔ-asonbo gɛsintin mɔ, gɛnen berɛ mɔ in baa i gyɛ ibono Wurubuaarɛ gi wolaa ka yela mɔ so ne. Gɛsintin gɛbono a nyi mɔ ne n gyɛ yɛɛ Wurubuaarɛ gi kpɛ ka daa yela sa Aberaham yɛɛ ɔ laa yɛgɛ asa mɛ' nyɛ wɔra Wurubuaarɛ asonbo gɛsintin kyu naa daa de mɔ Aberaham so. In gyɛ kyu naa de nbara gigyi mɔ so.

Ilaa Ibono Nbara Mɔ Gi Maŋ Taalɛ Wɔra Mɔ

¹⁹ Ne nbara mɔ gi maŋ yɛgɛ asa mɛ' nyɛ wɔra Wurubuaarɛ asonbo gɛsintin mɔ, menɛɔ so kiti-i ne ɔ baa yela nmɔ daa? Asa ilaa nyɛnyɛn so ne Wurubuaarɛ gi kyu nbara mɔ kyu bɔla ilaa ibono ɔ ka yela sa ɔmɔ mɔ so. ɔ kya laarɛ nbara mɔ gi' kpaa ɔmɔ kpaa fo aberɛ abono Aberaham ɔnaanabi mɔ laa ba mɔ. Mɔ-ɔnaanabi ɔbono ilaa ne Wurubuaarɛ gi wolaa ka yela mɔ. Owi ɔbono Wurubuaarɛ gi yela mɔ-nbara mɔ, o sun mɔ-isɔɔ iko ne mɛ kpaa tɔgɛ nmɔ sa Mosisi. Imɔso Mosisi gi san wɔra fɛɛ okpowura Wurubuaarɛ de anyamesɛ nsana. ²⁰ GENEN ilaa ibono i maŋ taalɛ wɔra ɔdan kpaa lii berɛ. I lii fɛɛ

okpowura yelε abaaƆon anyɔ nsana. Wurubuaarε berε gyε daa ɔkolon.

²¹ Abεε ɔko laa tɔgε yεε ilaa ibono Wurubuaarε gi ka yela mɔ de nbara nbono ɔ yela mɔ, in kya kyena de abara? Kuaa, in gyε gɛnen. Nbara nbono ɔnan gi laa taale sa nyamesε Wurubuaarε ase gεkyena ɔnan mɔ girj bo no. Naafɔ nkana i bo gɛnen nbara nbono ɔnan mɔ, ɔfaanan Wurubuaarε kya kerε asa ilaa wɔrasε so de o' wu yεε mɔmɔ-asen dɔ i boran kyu naa de gɛnen nbara nbono so. ²² Idε faa mɔ, in gyε gɛnen. Wurubuaarε agyεbi mɔ a kya nyiile yεε ilaa nyɛnyɛn giwɔra i kya nyε ɔlon anyamesε pɛwu so. I ba gɛnen de Wurubuaarε o' kyu daa asa abono mε kya ka gyan Yesu Kirisito so mɔ yεε mɔmɔ-asen dɔ ne n boran. Gɛnen ne Wurubuaarε gi wolaa ka yela ne. Nyamesε gikagyan so ne Wurubuaarε laa kyu mɔ yεε mɔ-gisen dɔ i boran.

Nbara Mɔ Gi Kerε Aye So Kaaborε Kirisito Gi Ba

²³ Pɛi de anyamesε mε' lɔɔ ka gyan Yesu so mɔ, Wurubuaarε nbara mɔ gi ηminde aye ne gi tii aye wɔra gɛnen kaaborε Yesu gi ba ne gikagyan gibono a laa ka gyan mɔ so mɔ gi' lii gɛwi. ²⁴ Imɔso nbara mɔ gi wɔra fεε nbii so ɔkerεbo, ne gi kerε aye so kaaborε Kirisito gi ba. Ne a san a kya ka gyan mɔ so de Wurubuaarε o' kyu aye yεε aye-asen dɔ i boran. ²⁵ Idε kon ibono a nyε ka gyan Yesu so faa, aη baa a tiri ɔbono ɔ laa kerε aye so mɔ.

Kirisito Gi Ba Faa, Fε Laa Nyε Ilaa Ibono Wurubuaarε Gi Ka Yela Mɔ

²⁶ Imɔso fɛye-rε Kirisito Yesu ginyamesε kolon mɔ so mɔ, fɛye pɛwu fε san wɔra Wurubuaarε mɔ-biana gɛsintin kyu naa de fɛye-gikagyan gibono fε ka gyan Yesu so mɔ. ²⁷ Ibono mε gyere fɛye Wurubuaarε sagyere ne fɛye-rε Kirisito fε wɔra nyamesε kolon mɔ, i yεgε

fɛ nyɛ kyɛɛgɛ baa nyɛ Kirisito gidebi fɛye-asen dɔ. ²⁸ Wurubuaarɛ mɛɲ kya kerɛ yɛɛ Gyuda awura ne, Geriiki awura ne, abono mɛ tɛ awura asɛ mɔ de abono mɛ tɛ mɔmɔ-gibaa so mɔ ne, abɛɛ anyen ne, abɛɛ akyii ne. Mɔ asɛ mɔ, fɛye pɛwu fɛ gyɛ nyamesɛ kolon kyu lii fɛye-rɛ Kirisito Yesu ginyamesɛ kolon mɔ so. ²⁹ Fɛye-rɛ Kirisito fɛ wɔra nyamesɛ kolon faa, fɛye kee fɛ gyɛ Aberaham mɔ-naanaana ne. Fɛ laa nyɛ ilaa ibono Wurubuaarɛ gi ka yela sa Aberaham mɔ-rɛ Kirisito ɔbono ɔ gyɛ mɔ-ɔnaanabi mɔ.

4

Pɛi Ne Kirisito Gi Ba Mɔ, A Kyena Sa Gɛsɛ Gɛrɛ Itiibilaa Mɔ Fɛɛ Nbide

¹ Fɛɛ ɔko laa baa yii mɔ-sɛ giyaa mɔ, owi ɔbono ɔ san ɔ gyɛ gɛbii mɔ, mɔ-rɛ gɛbide mɔ, ɔko mɛɲ don mɔ-nanbo. Yɛgɛ ɔ sɛɛ mɔ, mɔ ne nan gyi mɔ-sɛ atɔ pɛwu. ² ɔɲ ti sɛɛ mɔ, ɔ bo asa abono mɛ kya kerɛ mɔ-rɛ mɔ-atɔ mɔ so sa mɔ kaaborɛ ɔ' sɛɛ kpaa fo owi ɔbono mɔ-sɛ gi yela sa mɔ mɔ. ³ Gɛnen kee ne nkana aye a wɔra daa fɛɛ nbii Wurubuaarɛ ɔson dɔ, ne a kyena sa gɛsinkpan so nbara de itiibilaa fɛɛ nbide. ⁴ Wurubuaarɛ gɛlaarɛ dɔ owi mɔ gi san baa fo mɔ, ɔ keda mɔ-bi sun gɛsinkpan so. Gɛsinkpan gɛdɛ so ɔkyii ne n korogɛ mɔ. Mɛ korogɛ mɔ wɔra Gyuda awura nbara dɔ. ⁵ Wurubuaarɛ gi sun mɔ-bi mɔ gɛnen de aye abono nkana a kyena sa nbara mɔ, a' nyɛ aye-nyoro lii nbara gɛkyena mɔ dɔ de a' kyena sa Wurubuaarɛ de ɔ' san kyu aye yɛɛ a gyɛ mɔ-biana gɛsintin. ⁶ Ibono i kya lɛɛ nyiile aye yɛɛ a ti bingiri mɔ-biana gɛsintin mɔ ne n gyɛ yɛɛ Wurubuaarɛ gi kyu mɔ-bi mɔ-Oduduu mɔ wɔra aye-asen dɔ ne ɔ kya yɛgɛ a kya taalɛ terɛ Wurubuaarɛ yɛɛ, “N-sɛ, n-sɛ!” mɔ. ⁷ Imɔso i nyɛ ba fo ɔko gisen dɔ gɛnen mɔ, foɲ baa fo gyɛ gɛbide

sa WurubuaarE. Fo bingiri WurubuaarE mɔ-bi gEsintin. Ne fo ti nyE fo gyE WurubuaarE mɔ-bi gEnen mɔ, ɔ laa yEgE fo' nyE ilaa ibono ɔ ka yela sa mɔ-biana mɔ.

Pɔɔlo Kya Nyiile Galati Awura Nfono ME FuE Mɔ

⁸ Owi ɔbono fEη ti nyE bii fEye-rE WurubuaarE gEsE de gibi mɔ, fE son ikperE, yEgE iη kaaborE fE' son imɔ, ne fE wɔra nbide sa imɔ. ⁹ IdE kon fE nyE bii fEye-rE WurubuaarE gEsE de gibi faa (abE n' lɔɔ tɔgE yE E WurubuaarE ne n bii fEye-rE mɔ gEsE de gibi faa mɔ), nbara de itiibilaa ibono iη bo ilaa dɔ ne i maη taalE wɔra sEi sa fEye mɔ, fE laa kii kyu fEye-nyoro too imɔ so? Imɔso fE kya laarE de fE' kii wɔra nbide sa gEnen ilaa ibonoana? ¹⁰ FE kyu too fEye-nyoro so yE fE laa wɔra gEkE kyoolasE itiibilaa, ibosE itiibilaa de gEsi pobɔɔ de agyudɔ pobɔɔ de nkE belE-belE mɔ itiibilaa. ¹¹ N kya nu fEye so yE fo kya wɔra itiibilaa kpEi-kpEi gEnen mɔ, i kya wɔra me gifuu yE fonbii mɔ, gEnɔɔbono nE keda me-nyoro tɔgE WurubuaarE agyEbi mɔ sa fEye mɔ, nE wɔra imɔ too nkyu dɔ giyan ne.

¹² Imɔso me-nanboana Yesu asonbo, n dE fEye giserE, fE' wɔra aniya de fE' wɔra fE me. FEη sa fE' ka gyan itiibilaa so. I lii fE owi ɔbono n bo fEye asE nno mɔ, me kee nE wɔra fE fEye. Ne fE mEη wɔra me ilaa nyE nyE n iko. ¹³ FE gEnɔɔbono fE nyi mɔ, me-gilɔ so ne nE kpe fEye asE gigyangbarasE mɔ, ne nE nyE lE Yesu ɔkalan konkonsE mɔ tɔgE sa fEye. ¹⁴ NE kpe gEnen mɔ, fE mEη da me ikyɔɔ, ne fE mEη lE ansi taa me yEgE. FE yiyE me so owi ɔbono n kya lɔ mɔ. FE kerE me so de ɔkon fE n gyE daa WurubuaarE dɔ ɔsɔ abE n gyE daa Kirisito Yesu gbaa. ¹⁵ IdE kon fEye-ɔsakon ɔbono gi kyon fone daa? Me gbaa-gbaa n nyi fEye so yE gEnen owi ɔbono dɔ mɔ nkana fE laa taalE lE fEye-ilaa kamaasE sa me,

ba-a fɛye-ansibi gbaa. ¹⁶ Imɔso gɛsintin gɛbono n kpɛ mi-i tɔgɛ mi-i sa fɛye so mɔ, nɛ san bingiri fɛye-ɔkyobo?

¹⁷ Gɛnen asa abono mɛ kya tɔgɛ fɛye ɔkalan banban mɔ berɛ, mɛ kya laarɛ fɛye-ilaa faa mɔ, in taa gyɛ ilaa dɛnsɛ iko so. Mɛ kya laarɛ daa de mɛ' nyɛ tɛɛ fɛye lii me asɛ de mɛ' nyɛ de fɛ' laarɛ mɔmɔ-ilaa. ¹⁸ Fɛɛ ilaa dɛnsɛ so ne ɔko kya laarɛ fɛye-ilaa mɔ, imɔ ibono i laa kpaa fɛye owi kamaasɛ. Me kee n kya laarɛ fɛye-ilaa. In gyɛ owi ɔbono n bo fɛye asɛ mɔ wolɛ. ¹⁹ Me-biana, nɛ wolaa wu ɔlaa fɛye so, ne n' kii n kya wu ɔlaa fɛye so fɛɛ gɛnɔɔbono gɛdun gɛ kya tu ɔkyii mɔ. Nan wu ɔlaa fɛye so gɛnen kaaborɛ Yesu Kirisito gidebi gi' lii gɛwi fɛye dɔ. ²⁰ I bo me ɔbolɛ fɛɛ nkana n' nyɛ n bo fɛye asɛ de n' nyɛ bii gɛtɔngɛ gɛbono nan tɔngɛ sa fɛye mɔ. Fɛye-ilaa i bo me-gisen dɔ gɛnɔnko gɛnɔnko daa.

Haga De Sara Ilaa

²¹ Fɛye abono fɛ kya laarɛ de fɛ' kyena sa Gyuda awura nbara mɔ, fɛ nyi yɛɛ fɛ kya gyi nbara mɔ so ne? Fɛ' nu gɛnɔɔbono nan baa lɛɛ nmɔ gɛsɛ sa fɛye mɔ. ²² Mɛ ŋmarasɛ Gyuda awura nbara mɔ dɔ yɛɛ Gyuda awura mɔmɔ-naana gyangbarasɛ Aberaham gi korogɛ anyen anyɔ. ɔko mɔ-nyi gyɛ Aberaham mɔ-ka obolonbu. ɔko mɔ mɔ-nyi gyɛ Aberaham mɔ-ka yɛsɛ. ²³ I kii koso mɔ, mɔ-ka mɔ obolonbu mɔ gi nyɛ ɔɔ korogɛ sa mɔ fɛɛ gɛnɔɔbono anyamesɛ mɛ kya nyɛ itɔ korogɛ mɔ. Mɔ-ka yɛsɛ mɔ berɛ gi nyɛ ɔɔ korogɛ sa mɔ mɔ, i gyɛ daa Wurubuaarɛ ilaa wɔrasɛ. Wurubuaarɛ gi ka yela sa mɔ yɛɛ ɔ laa nyɛ gɛbii, yɛgɛ ɔ gyɛ ɔlabanbo.

²⁴ Gɛnen akyii anyɔ adɛ ilaa i gyɛ daa fɛɛ gikpalɛ sa aye anyamesɛ. Akyii mɔ mɛ yelɛ mɛ sa gɛnɔ dedaa de gɛnɔ pobɔɔ gɛbono Wurubuaarɛ gi yɛgɛ mɔ-rɛ anyamesɛ mɛ wɔra de mɛ' kyu kyena de abara mɔ.

GɛNɔ dedaa ne n gyɛ Wurubuaarɛ nbara nbono o kyu sa anyamesɛ Saanayi gibii mɔ so mɔ. Gɛnen gɛNɔ gɛbono gɛ dɛ fɛɛ Aberaham mɔ-ka obolonbu mɔ. ɔ kya korogɛ nbii nbono mɛ tɛ sa ako mɔ. Mɛ kya terɛ mɔ yɛɛ Haga. ²⁵ Saanayi gibii mɔ gi bo daa Arabiya gɛsinkpan so. A kya nu yɛɛ Haga ginyen gi gyan gɛnen gɛsinkpan gɛbono so. Haga kee yeɛ ɔ sa Gyɛrusalem, Gyuda awura ɔsowolɛ gɛmu ɔbono ɔ bo no ndɛ faa. I kya nyiile yɛɛ Gyɛrusalem ɔbono mɔ-rɛ mɔ-asa pɛwu mɛ tɛ sa daa ako.

²⁶ Wurubuaarɛ dɔ lɛɛ Gyɛrusalem ɔsowolɛ mɔ berɛ mɛɲ tɛ ɔ sa ako. ɔ dɛ daa fɛɛ Aberaham mɔ-ka yɛɛ Sara. Aye abono a kya ka gyan Yesu so mɔ, Wurubuaarɛ dɔ lɛɛ ɔsowolɛ baarɛ dɛ fɛɛ aye-nyi. ²⁷ Fɛ' nyingi yɛɛ Sara ilaa ɔnan i bo Wurubuaarɛ agyɛbi dɔ yɛɛ,

“Fo ɔbono foɲ ti korogɛ mɔ, yɛgɛ i' wɔra fo ɔkon.

Fo ɔbono foɲ ti da ɔɔ mɔ, kpen de fo' wɔra ɔlanba de ɔkon.

I kya nyiile yɛɛ fo ɔbono fo-kuli gi koso taa fo yɛgɛ mɔ, fo laa kii baa nyɛ nbii don ɔkyii ɔbono ɔ bo ɔnyen mɔ.”

²⁸ Imɔso, me-nanboana Yesu asonbo, fɛ' bii yɛɛ aye abono a kya ka gyan Yesu so mɔ a dɛ fɛɛ Sara mɔ-bi, Ayisiki, ɔbono Wurubuaarɛ gi wolaa ka yela sa mɔ yɛɛ ɔ laa nyɛ mɔ. ²⁹ Aberaham mɔ-biana anyɔ mɔ dɔ mɔ, mɛ korogɛ ɔko gɛNɔɔbono anyamesɛ mɛ kya nyɛ itɔ korogɛ mɔ. ɔnyɔsɛ mɔ berɛ kyu lii Wurubuaarɛ Oduduu mɔ so ne mɛ korogɛ mɔ. Nbii nnyɔ ndɛ aberɛ dɔ mɔ, anyamesɛ ɔlon dɔ lɛɛ gɛbii mɔ gɛ kyo Wurubuaarɛ Oduduu dɔ lɛɛ gɛbii mɔ. Gɛnen gɛkyo gɛbono ɔnan ne n dɛ baa lii de ndɛ' kee faa. Abono mɛ kya ka gyan nbara gigyi so mɔ mɛ kya kyo aye abono a kya ka gyan Yesu Kirisito so mɔ. ³⁰ Menɛ ne Wurubuaarɛ agyɛbi mɔ a kya

nyiile aye kyu lii nbii nnyɔ ndɛ so? A kya nyiile aye yɛɛ Wurubuaarɛ gi tɔgɛ Aberaham yɛɛ,
 “Gya fo-ka obolonbu mɔ mɔ-rɛ mɔ-bi mɔ lii fo-gɛten dɔ. Gɛnen fo-bi ɔbono maŋ nyɛ gyi fo-atɔ.
 Fo-ka yɛɛ mɔ mɔ-bi mɔ ne nan gyi fo-atɔ.”
 Imɔso lii agyɛbi adɛ dɔ mɔ, a bii yɛɛ fɛɛ gɛnɔɔbono Haga mɔ-bi mɛŋ nyɛ gyi Aberaham atɔ mɔ, gɛnen kee ne abono mɛ kya ka gyan nbara mɔ so mɔ mɛ maŋ nyɛ kyena Wurubuaarɛ asɛ ne. ³¹ Aye abono a kya ka gyan Yesu so mɔ berɛ, a kya nyɛ Wurubuaarɛ asɛ gɛkyena. Imɔso me-nanboana Yesu asonbo, a mɛŋ dɛ fɛɛ Aberaham mɔ-ka obolonbu mɔ mɔ-biana. A dɛ daa fɛɛ Aberaham mɔ-ka yɛɛ mɔ mɔ-biana.

5

Yesu Gi Yɛgɛ A Nyɛ Aye-Nyoro

¹ Kirisito gi laarɛ yɛɛ aye abono a kya ka gyan mɔ so mɔ a' nyɛ aye-nyoro lii ɔfɛ dɔ. I kya nyiile yɛɛ mɔ so ne Wurubuaarɛ gi kyu aye yɛɛ aye-asen dɔ i boran. Imɔso fɛ' yelɛ fɛye-ayaa so girin. Fɛŋ sa fɛ' yɛgɛ itiibilaa de nbara mɔ i' kii ŋminde fɛye. ² Fɛ' nu dandan. Me, Pɔɔlo n kya buu mi-i sa fɛye yɛɛ fɛ yɛgɛ mɛ' ten fɛye-awɔrɛ Gyuda awura itiibilaa ɔkpa so yɛɛ imɔ ne nan mɔlɛgɛ fɛye mɔ, Kirisito maŋ baa mɔlɛgɛ fɛye. ³ N kii mi-i tɔgɛ fɛye ɔkamaasɛ yɛɛ fo ɔbono fo yɛgɛ mɛ' ten fo-giwɔrɛ Gyuda awura itiibilaa ɔkpa so mɔ, fo-rɛ Gyuda awura nbara de itiibilaa mɔ pɛwu ne kpɛɛ'ɛ. ⁴ Fo ɔbono fo kya laarɛ fɛɛ Wurubuaarɛ o' kyu fo yɛɛ fo-gisen dɔ i boran kyu naa de fɛye-nbara gigyɛ so mɔ, fo-rɛ Kirisito nsana i tɛɛ ne. Fo lɛɛ fo-nyoro lii Wurubuaarɛ gitolon gibono ɔ kya kyu mɔlɛgɛ asa mɔ dɔ ne. ⁵ Aye berɛ, Wurubuaarɛ Oduduu kya kpaa aye ne aye-ansi a kpɛ a gyan yɛɛ aye-asen dɔ i laa wɔra ɔdan sa Wurubuaarɛ kpaa logɛ. A nyi

ibono i laa ba gɛnen sa aye kyu naa de gikagyan gibono a kya ka gyan Kirisito so mɔ. ⁶ I lii fɛɛ aye abono aye-rɛ Kirisito Yesu a gyɛ nyamesɛ kolon mɔ, a nyi yɛɛ giwɔrɛ giten de gimaaten mɔ, imɔ iko-rɛ iko i mɛɲ taa tiri. Ilaa kolon ibono i kpɛ i tiri mɔ ne n gyɛ yɛɛ fo nyamesɛ fo' ka gyan Yesu so de fo-gikagyan gibono gi' lii gɛwi naa de fo-gɛlaarɛ' gɛbono fo bo sa Wurubuaarɛ de fo-nanbo nyamesɛ mɔ so.

⁷ Nkana fɛ ti fɛ dɛ fɛye-gikagyan dɔ kanpɛ. Anɛana ne n baa kpadɛɛ fɛye ne fɛɲ baa fɛ kya buu gɛsintin mɔ ɔkpa mɔ daa? ⁸ Gɛnen gɛwɔnsa gɛdɛ gɛɲ kya lii Wurubuaarɛ asɛ. Wurubuaarɛ berɛ kya tɔgɛ fɛye yɛɛ fɛ' keda gɛsintin ɔkpa mɔ dɔ. ⁹ Fɛ' kerɛ dandan. Ilaa nyɛnyɛn pi-i i kya nyida ilaa gikyɔ. I dɛ daa fɛɛ gɛnɔɔbono bodobodo gɛlin pi-i gi kya yɛgɛ bodobodo kya ɲan dii mɔ. ¹⁰ Nɛ taa tɔgɛ gɛnen faa mɔ, Wura Yesu so mɔ, n nyi me-gisen dɔ yɛɛ fɛ maɲ taa sɔɔ ilaa banban iko gyi. Abono mɛ kya kpadɛɛ fɛye-nwɔnsa mɔ, ba-a anyamesɛ gbaa'gbaa ne mɛ gyɛ mɔ, Wurubuaarɛ laa biidɛ mɔmɔ-giso.

¹¹ Me-nanboana Yesu asonbo, me berɛ, mɛɲ kya nyiile asa yɛɛ awɔrɛ giten nbara i tiri sa Wurubuaarɛ. Nkana gɛnen ne n' dɛ mɔ, naafo Gyuda awura mɛ maɲ ka mɛ-ansi. Naafo n san n dɛ awɔrɛ giten nbara mɔ, nkana gɛnɔɔbono n kpɛ n dɛ yɛɛ Yesu oyii so lɛwu mɔ wole ne n kpɛ i tiri mɔ, nkana i maɲ baa loo asa. ¹² Asa abono mɛ kya kpadɛɛ fɛye-nwɔnsa mɔ gɛnen mɔ, mɛ nyi yɛɛ awɔrɛ giten i gyɛ ilaa dɛnsɛ sa ɔmɔ mɔ, mɛ maa tɛsɛ lɛɛ mɔmɔ-awɔrɛbi kee?

¹³ Me-nanboana Yesu asonbo, fɛye berɛ, Wurubuaarɛ gi tɔgɛ fɛye yɛɛ fɛ' kyu fɛye-nyoro too Yesu so de fɛ' nyɛ fɛye-nyoro lii nbara de itiibilaa gigyi so. Ibono fɛ nyɛ fɛye-nyoro gɛnen faa mɔ, fɛ mɛɲ sa fɛ' kyu imɔ yɛɛ

ɔkpa gi bugi sa fɛye de fɛ' wɔra ilaa ibono fɛye anyamesɛ-lɛɛ gidebi mɔ i kya laare mɔ. Fɛ' kyu gɛsalaare kyu son abara. ¹⁴ I lii fɛɛ Wurubuaare nbara nbono ɔ yela pɛwu mɔ gi kya baa yii daa de nbara kolon yɛɛ, “Laare fo-nanbo fɛɛ fo-nyoro mɔ.” ¹⁵ Ne fɛye mɔ, fɛye yɛɛ fɛ laa dun daa abara de fɛ' kyade abara fɛɛ ndonbuɛ berɛ mɔ, fɛɛ kerɛ dandan mɔ, fɛ laa nyida daa abara de fɛye-ikyenaten Wurubuaare ase i' lii fɛye-abaa.

Anyamesɛ Gidebi Mɔ Ilaa Wɔrasɛ

¹⁶ Imɔso ilaa ibono n kpɛ n dɛ mɔ ne n gyɛ yɛɛ fɛ' kyena fɛɛ gɛnɔɔbono Wurubuaare Oduduu mɔ kya nyiile fɛye mɔ. Fɛ wɔra gɛnen mɔ, fɛ maɲ wɔra ilaa ibono fɛye-anyamesɛ-lɛɛ gidebi mɔ i kya laare mɔ. ¹⁷ I lii fɛɛ anyamesɛ-lɛɛ gidebi mɔ i kya laare yɛɛ i' tii Wurubuaare Oduduu mɔ ɔkpa. Wurubuaare Oduduu mɔ mɔ kya laare yɛɛ o' tii aye-anyamesɛ-lɛɛ gidebi mɔ ɔkpa. Gɛnen ilaa inyɔ idɛ iɲ kya dabɔlɛ abara dɔ de i' kyena. Gɛnen so mɔ, a mɛɲ kya nyɛ wɔra ilaa ibono a kya laare mɔ. ¹⁸ Fɛɛ Wurubuaare Oduduu mɔ ne n gyangbara sa fɛye mɔ, iɲ baa i gyɛ Wurubuaare nbara mɔ ne fɛ tɛ sa.

¹⁹ Ilaa nyɛnyɛn ibono ɔnan aye-anyamesɛ-lɛɛ gidebi i kya yɛgɛ a kya wɔra mɔ iɲ bo sen de nyamesɛ o' wu imɔ bii. Imɔ iko ne n gyɛ yɛɛ nyamesɛ kya laare agyibara. ɔ kya wɔra ilaayan. ɔ kya wɔra ilaa kankaran. ²⁰ ɔ kya son ikperɛ. ɔ kya sɔɔ afɛ. ɔ kya kyo asa. ɔ kya laare laatɔngɛ. ɔ kya wɔra onsipara. ɔ bo ginyadon foro-foro. Mɔ-rɛ asa mɛ kya kyena gikoso gɛgyanbuɛ gɛkyena. Mɔ-rɛ ako mɛ kya wɔra gɛnɔ ako so. ɔ kya lɛɛ ako laare taa ako yɛgɛ. ²¹ Asa ilaa i bo mɔ gɛlaaloo. ɔ kya nun nta gɛɛlɛ nyoro. Ne ɔ kya wɔra ibon. Anyamesɛ-lɛɛ gidebi i kya yɛgɛ asa mɛ' wɔra ilaa nyɛnyɛn banban kee. Fɛɛ gɛnɔɔbono nɛ tɔgɛ fɛye baa kyon mɔ, n kya kii mi-i tɔgɛ mi-i sa fɛye

ne-o: fo ɔbono fo yɛɛ imɔ idɛana ne fo laa wɔra mɔ, fo maŋ nyɛ kyena Wurubuaarɛ asɛ mɔ-gɛwuraɣi mɔ dɔ.

Wurubuaarɛ Oduduu Mɔ Ilaa Wɔrasɛ

²² Ilaa ibono Wurubuaarɛ Oduduu mɔ kya yɛɛɛ asa mɛ' wɔra mɔ iŋ dɛ fɛɛ ilaa nyɛnyɛn idɛana. Wurubuaarɛ Oduduu mɔ kya yɛɛɛ daa asa mɛ' nyɛ gɛlaarɛ' mɔmɔ-asɛn dɔ. ɔ kya sa ɔkon de gisɛn yuuli. ɔ kya yɛɛɛ asa mɛ' nyɛ gisɛn, ɔ kya yɛɛɛ mɛ' wɔra ilaa ibono i kya yuuli asa asɛn mɔ, mɛ' wɔra gidɛnsɛ, mɛ' gyi gɛsintin sa asa, ²³ mɛ' buu asa, de mɛ' taalɛ mɔmɔ-nyoro. Nengyene asa mɛ kya wɔra gɛnɛn ilaa idɛana mɔ, iŋ bo nbara nko gi laa bun mɔmɔ gɪpuɛɛ. ²⁴ Abono mɛ gyɛ Kirisito Yesu-lɛɛ asa gɛsintin mɔ, mɛ kine mɔmɔ-anyamɛɛ-lɛɛ gidebi mɔ imɔ-rɛ imɔ-ilaa laarɛɛ de imɔ-ilaa diilɛɛ pɛwu. I wɔra fɛɛ mɛ kyu mɔmɔ-gidebi gibono kyu da aŋanbi mada de oyii mɔɔ ne.

²⁵ Aye abono a kya ka gyan Yesu so mɔ, a ti nyɛ Wurubuaarɛ Oduduu mɔ ti ɔ tɛ aye-asɛn dɔ faa mɔ, a' tɛɛɛ naa fɛɛ gɛnɔɔbono Wurubuaarɛ Oduduu mɔ kya nyiile aye mɔ. ²⁶ A mɛɛ sa a' nyiile aye-nyoro abɛɛ a' kyena gikoso gɛgyanbuɛ gɛkyena abɛɛ a' yɛɛɛ ɔko ilaa i' wɔra aye gɛlaaloo.

6

Fɛ' sɔɔ Abara Nsola Sola

¹ Me-nanboana Yesu asonbo, nengyene fɛ wu yɛɛ fɛye dɔ ɔko kya wɔra ilaa nyɛnyɛn iko mɔ, fɛye abono fɛ kya nu Wurubuaarɛ Oduduu mɔ asɛ fɛye-gɛkyena dɔ mɔ, fɛ' kyu buubuu kyu buɛɛɛ gɛnɛn kaasɛ mɔ de ɔ' lii imɔ dɔ. Fɛ' kerɛ fɛye-nyoro so de i mɛɛ sa i' penɛ fɛye kee kpaa loo ilaa nyɛnyɛn dɔ. ² Fɛ' sɔɔ abara nsola sola. Fɛ wɔra gɛnɛn mɔ, fɛ laa nyɛ gyi Kirisito-lɛɛ nbara so.

³ Nengyene ɔko kya buu mɔ-nyoro yɛɛ ɔ don asa sɛnsɛ yɛgɛ oŋ kii don ɔmɔ mɔ, ɔ kya ten mɔ-nyoro gɛnɔ daa. ⁴ Fɛye berɛ fɛye ɔkamaasɛ ɔ' kɛɛ nu daa de mɔ gbaa-gbaa lɛɛ ilaa wɔrasɛ de ɔ' kerɛ yɛɛ i boran abɛɛ iŋ boran. Fɛ kya wɔra gɛnen mɔ, fɛye gbaa-gbaa ilaa wɔrasɛ so ne fɛ laa nyɛ nyiile fɛye-nyoro. Iŋ gyɛ ɔko-lɛɛ ilaa wɔrasɛ so. ⁵ ɔkamaasɛ o' nu de mɔ-lɛɛ gidebi. I lii fɛɛ ɔkamaasɛ mɔ-rɛ mɔ-lɛɛ gɛsola. ⁶ Nengyene ɔko kya nyiile fo ɔko Wurubuaarɛ agyɛbi mɔ, fo kee kyu ilaa dɛnsɛ ibono fo bo mɔ kyu kɛpa mɔ.

⁷ Fɛŋ sa fɛ' penɛ fɛye-nyoro. Fo ɔko fo maŋ taalɛ penɛ Wurubuaarɛ. Ilaa ibono fo duu mɔ, imɔ kee ne nan kɔrɔ. ⁸ Fɛɛ fo anyamesɛ-lɛɛ ɔbole gɛlaarɛ ne fo yɛɛ fo laa wɔra mɔ, kyu lii fo anyamesɛ gidebi mɔ so ne fo-ilaa i laa nyida wɔra fo. Ne fo ɔbono mɔ fo kya wɔra daa Wurubuaarɛ Oduduu mɔ gɛlaarɛ mɔ, kyu lii Wurubuaarɛ Oduduu mɔ kee so ne fo laa nyɛ ɔkyenaten Wurubuaarɛ asɛ gɛkɛpa.

⁹ Idɛnsɛ giwɔra i mɛŋ sa i' fii aye. Nengyene idɛnsɛ giwɔra iŋ yɔɔ aye-nyoro mɔ, owi ɔko laa baa ba ibono Wurubuaarɛ laa yɛgɛ a' nyɛ imɔ so ntɛɛla. ¹⁰ Imɔso a nyɛ ɔkɛpa mɔ, a' wɔra gidɛnsɛ sa nyamesɛ kamaasɛ, titirigu mɔ, abono aye-rɛ ɔmɔ a gyɛ Yesu Kirisito ɔson gikpen mɔ dɔ asa mɔ.

Pɔɔlo Agyɛbi Laalaalogɛ

¹¹ Fɛ' kerɛ agyɛbi kiirɛsɛ abono me gbaa-gbaa n dɛ me-gibaa n kya ŋmarasɛ fɛye-ɔwolɛ mɔ laalaalogɛ mɔ. ¹² Asa abono mɛ kya laarɛ yɛɛ mɔmɔ-ilaa i' wɔra anyamesɛ ɔbole ansi so wolɛ mɔ ne nan nyise fɛye yɛɛ fɛ' ten awɔrɛ Gyuda awura itiibilaa ɔkɛpa so pɛi de fɛ' nyɛ loo Yesu ɔson mɔ dɔ. Gɛnen asa abono mɛ selɛ Gyuda awura gifuu daa. Mɛ nyi yɛɛ nengyene mɛ ka gyan Yesu

Kirisito lɛwu ɔbono o wu' sa aye oyii mɔ so taa mɔmɔ Gyuda awura itiibilaa mɔ yɛgɛ mɔ, Gyuda awura mɛ laa naa ka mɔmɔ-ansi. ¹³ Mɔmɔ abono yɛɛ fɛ' ten awɔrɛ de fɛ' wɔra Gyuda awura itiibilaa pɛwu mɔ gbaa mɛ mɛɲ kya taa wɔra imɔ kpaa logɛ. Yɛgɛ mɛ kya laarɛ fɛ' ten awɔrɛ ansi so de mɛ' nyɛ diirɛ mɔmɔ-nyoro yɛɛ fɛ kyule wɔra mɔmɔ-itiibilaa daa.

¹⁴ Me berɛ, Wurubuaarɛ ɔ' kparɛ fuɛ! Nan taa diirɛ me-nyoro gbaa mɔ, i' wɔra daa aye-Wura Yesu Kirisito lɛwu ɔbono o wu' sa aye oyii so mɔ wolɛ so ne n' diirɛ me-nyoro. Wura Yesu Kirisito lɛwu baarɛ so mɔ, gɛsinkpan so ilaa ibono i tiri sa mɔmɔ abono mɛɲ kya sɔɔ Wurubuaarɛ gyi mɔ, i mɛɲ baa i tiri me. Ne ilaa ibono i tiri me nperɛ faa kee, i mɛɲ tiri ɔmɔ. ¹⁵ I lii fɛɛ awɔrɛ giten de gimaaten itiibilaa mɔ, imɔ iko-rɛ iko i mɛɲ taa tiri. Ilaa kolon ibono i kpɛ i tiri mɔ ne n gyɛ ibono fo nyamesɛ fo laa kyɛɛgɛ lii ilaa nyɛnyɛn giwɔra dɔ de fo' wɔra nyamesɛ pobɔrɔ fo-gɛkyena dɔ mɔ. ¹⁶ Asa abono mɛ kya kyule yɛɛ gɛnen ilaa kolon idɛ ne n tiri mɔ, Wurubuaarɛ gisen yuuli de mɔ-gitolon gi gyɛ mɔmɔ pɛwu-lɛɛ. Mɔmɔ ne n gyɛ Isirale awura abɛɛ Wurubuaarɛ asonbo gɛsintin.

¹⁷ Kyu lii ndɛ' kyu i kya kpɛ mɔ, ɔko-rɛ ɔko ɔɲ' baa nyida me-ginyen. N kya wɔra Yesu gɛsun mɔ so mɔ, nɛ wu ɔlaawusɛ. Apan abono a tɛ me-nyoro so faa ne n kya lɛɛ nyiile yɛɛ n gyɛ Yesu ɔsɔɔ gɛsintin.

¹⁸ Me-nanboana Yesu asonbo, aye-Wura Yesu Kirisito ɔ' sa fɛye so gɛwɔnsa dɛnsɛ de fɛye-oduduu dɔ ilaa i' wɔra ɔdan sa fɛye. I' ba gɛnen.

ḠḠḠḠ ḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov
2021

4cc402b4-139a-5f33-9af9-fbf62307f663